

Акафист
Божией Матери
перед иконой Ея «Спорительница хлебов»
Празднование 14/28 октября

Кондак 1

Избранней от всех родов Божией Матери и Владычице Небесе и земли, избавляющей нас от всякия нужды, благодарственное приносим пение. Ты же, всемилостивая Госпоже Богородице, приими наше усердное моление, сохрани нас от глада и пагубы, даруй земли нашей плодоносие, Питательнице и Спорительнице нив и хлебов наших, да радуящиеся всегда зовем Ти:

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Икос 1

Ангелов Творец избра Тя, Владычице, к благодатному человеков спасению, и дарова Тя, помощницу людем, избавляющую нас от глада и всяких напастей, житие наше добре устрояющую во всяком мире и довольстве, темже со умилением взываем Ти:

Радуйся, благодатное человеков избавление от всякия нужды; радуйся, достоянию Твоему помощь и заступление. Радуйся, христоробивыя люди от бед спасающая; радуйся, алчущих питательнице. Радуйся, сырых заступнице; радуйся, нагих одеяние. Радуйся, израстившая нам Плод Живота; радуйся, Спаса рождшая душ наших.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 2

Видев Сын Твой, Богомати, великое Твое к людем милосердие, глаголет к Тебе: «Проси, Мати Моя, зане не отвращуся Тебе, но исполню вся прошения Твоя». Мы же, прославляюще сие дивное промышление о роде человеческом, вопием Богу: Аллилуия.

Икос 2

Разум небесный даровася преподобному старцу Амвросию, настави его написати во обители, им созданной, икону Пресвятыя Богородицы и нареци ю Спорительница хлебов, яко Ты, Пресвятая Дево, спасаеши люди Твоя от глада, даруеши земли плодоносие, посылаеши дождь ранний и поздний на нивы и поля наша, защищаеши люди Твоя от смертоноснаго вреда и пагубы, темже вопием Тебе таковая:

Радуйся, Дево, христиан похвало; радуйся, яко блажат Тя вси роди. Радуйся, яко благословляеши и спориши хлебы наша; радуйся, яко избавляеши нас от глада. Радуйся, питающая нас хлебом жизни; радуйся, млеко питавшая Питателя Вселенныя.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 3

Силою свыше укрепи нас, благодатная Владычице, во дни глада и пагубы, да не погибнем люте без покаяния во унынии и отчаянии, но утверди и настави нас в терпении и благоугождении Богу, да разумеем в напастех и скорбех волю Его святую, благую и совершенную, непрестанно хваляще Бога и взывающе Ему: Аллилуия.

Икос 3

Имущи любовь велию к людем, искупленным честною кровию Сына Твоего и Бога, Богомати Пречистая, прияла еси от Него власть устроить и покрывати род христианский. Ты бо бедствующим помощнице еси скорая, градом и весем, селам и нивам, и всему миру покров. Тебе, милосердной и боголюбивой Матери нашей, устрояющей и направляющей ко спасению земную жизнь нашу, смиренномудренно глаголем:

Радуйся, Благогаго Сына Благая Мати; радуйся, непрестанно молящаяся о спасении и помиловании нас грешных. Радуйся, о всем мире христианством к Богу ходатаице; радуйся, благ всяческих всеблагая подательнице. Радуйся, плененных и в темницах заключенных питательнице; радуйся, тела моего здравие и души спасение. Радуйся, яко рай пищный процветаеши; радуйся, яко пристанище душам готовиши.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 4

Буря противных ветров, егда найдет на нас внезапно, громы и молнии, град и вода многая устремится на землю, тогда, Госпоже Всемиловитая, ускори на помощь нам, беспомощным, защити и избави нас от дождевнаго лияния, егоже сотворихомся достойни грех ради наших, и да будут поля и нивы невредимы от сих, и да не потопит нас буря водная. Тебе бо грешнии имамы заступницу непостыдную, на Тя упование наше возлагаем и, прославляюще силу молитв Твоих, рождшемуся от Тебе Спасу мира зовем: Аллилуия.

Икос 4

Слышаще и видяще Твое сострадание, Владычице, к бедствующим и гибнущим людем, к Тебе, грешнии, прибегаем и молимся: о, Пресвятая Дево, услыши нас грешных, и во дни, егда солнце изсушит землю и от сухости зной будет, и прозябения земная начнут увядати, тогда, Владычице, росу благодати Твоея низпосли на требующия и просящия милости, возвесели лице земли, нищих ради людей Твоих, младенец, и скотов, и иных всех, иже чают дати им пищу во благо время, и от святых иконы Твоея Спорительницы яви милосердие Твое вопиющим Тебе таковая:

Радуйся, молитвеннице неусыпающая ко Христу Богу, на милость к нам Его преклоняющая; радуйся, кару Божию за беззакония наша от глав наших отводящая. Радуйся, Матерним покровом

Твоим от всяких несчастий нас охраняющая; радуйся, поля и нивы наша от запаления солнечного и зноя спасающая. Радуйся, всемилостивая услышательнице гласов наших молебных в скорби и обстоятельствах; радуйся, жилища наша от огня спасающая. Радуйся, державная скоропомощнице наша во дни тяжких испытаний; радуйся, от всех бед скорое избавление.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 5

Боготечная звезда, икона Твоя, Богомати, людем просящим хлеба насущного немерцаемо сияет. Покровом бо Твоея милости соблюдаеши поля и нивы наша и плодоносити их устрояеши, подвизая верныя вопити Христу Богу: Аллилуия.

Икос 5

Видя Тя Сын Твой при Кресте стоящую с возлюбленным учеником, глаголет Тебе: «Жено, се Сын Твой» и ученику: «Се Мати твоя», всыновляя Тебе вся верующия в Него. Мы же, чада Твоя сущия, на Твой покров надеющиеся, Тебе, яко Матери нашей, глаголати дерзаем:

Радуйся, Судии Праведнаго умоление; радуйся, грехов наших прощение. Радуйся, надеждо наша известная; радуйся, упование наше непостыдное. Радуйся, скорбей наших разрешение; радуйся, печалей наших утоление. Радуйся, пламене страстей изменяющая; радуйся, всех родов

веселие.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 6

Проповедует Церковь Христова чудеса Твоя, Богородительнице, от востока бо до запада хвально имя Твое, и несть града или страны, идеже не совершися Тобою действие силы Божия во избавление и спасение, просвещение и исцеление людей христоименитых, наипаче же чрез иконы Твоя святых обикла еси чудотворити, изливающи от них струи милостей и щедрот бедствующему и требующему помощи человечеству. Сего ради славословяще Тя, Сыну Твоему и Богу нашему вопием: Аллилуия.

Икос 6

Возсияла еси от истиннаго Солнца заря, Дево Богоотроковице, просвещающи души всех, томимых голодом душевным, рече бо Господь: «Не о хлебе едином жив будет человек, но о всяком глаголе, исходящем из уст Божиих». Обаче помрачишася очи наша и окаменеша сердца наша и не видим очима своима и не разумеем сердцем судеб Божиих. Томими убо душевным голодом, к Тебе прибегаем, Пречистая Дево, и просим словом жизни утолить голод душевный нас, вопиющих Тебе таковая:

Радуйся, от убожества душевнаго нас воздвизающая; радуйся, питающая нас словом жизни: Радуйся, трапезо пресветлая, Хлеб жизни

носившая; радуйся, пище, манны приемнице. Радуйся, земле благая, Клас Божественный израстившая; радуйся, ниво, растящая многоплодие щедрот. Радуйся, камению, напоивший жаждущия жизни; радуйся, милость сугубо нам подающая.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 7

Хотящим жати спасение, яко село сладкое показала еси Владычице, от негоже питающесе, имамы пищу вечную и нетленную. Мы же, земнии суще, молим Тя, Пречистая Дево, покажи силу Твою на жатве нив и полей наших, егда приидет время их, и всяк злак да изобилует на утешение нас, поющих Богу: Аллилуия.

Икос 7

Дивно прославилася еси, Богомати в защищении людей православных. Возстающий бо на Бога не познают, коль сильна есть молитва Божией Матери. Мы же о Твоем всемогущем заступлении, помощи и благословении добре ведуще, сие к Тебе со умилением зовем:

Радуйся, чистых руками и сердцем земледельцев благословенными плоды венчающая; радуйся, бедствующим среди напастей и трудов внезапное вспоможение. Радуйся, безматерних сирот незримая воспитательнице; радуйся, помощнице всех беспомощных. Радуйся, кормительнице вдов и сирот; радуйся, подающая силу, пищу и отраду

болящим и разслабленным. Радуйся, одежду нагих дерзновения; радуйся, многих согрешений прощение.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 8

Якоже древле содействовала еси схождению на землю Спасителя мира, сие и ныне, яко солнце светозарное, восходиши над созревающей нивою, предшествующи приходу Господина с жателями. Тому и мы со страхом вопие: Аллилуия.

Икос 8

Все упование наше на Тя возлагаем, Мати Божия, и в скорбех наших ко святей иконе Твоей Спорительнице усердно притекаем, чающе получитьи от Тебе утешение благодатное и вспоможение во оскудении и нищете нашей, взываем Ти:

Радуйся, милости превеликия сокровище; радуйся, пище и утешение к Тебе прибегающих. Радуйся, хлебе неснедаемый алчущих; радуйся, быстрое нищих услышание. Радуйся, скорбящих от глада и нужды приятное попечение; радуйся, к Свету неприступному нас извлачающая. Радуйся, ключу Царствия Христова; радуйся, надеждо благ вечных.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 9

Вси людие дивятся величию чудес Твоих, Пресвятая Дево, изливаемых Тобою от святых Твоих икон, яко всем даруеши по коегождо прошению: устрояеши дома наша, посылаеши благословение земледельцем, даруеши людем всякое довольство. Темже вопием Сыну Твоему: Аллилуия.

Икос 9

Вития многовещанная не могут воспети чудес Твоих, Богомати Владычице, яко всем концем земли простираеши руку помощи и низпосылаеши верным земли плодоносие, благорастворение воздушов и всякое изобилие плодов и благ земных. Мы же во смирении своем исповедающе Твое великое заступление о нас грешных и непрестанную помощь в нуждах наших, вопием Ти:

Радуйся, достойно восхваляемая от архангел и ангел; радуйся, величаемая от всех Небесных сил. Радуйся, честнейшая Херувим; радуйся, славнейшая без сравнения Серафим. Радуйся, Владычице неба и земли; радуйся, Родительнице вечнаго Царя. Радуйся, верная Рабо Господня; радуйся, ублажаемая на Небеси и на земли.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 10

Спасительное прибежище в скорбех и напастех Ты еси, Богородице, темже испроси у Сына Твоего

и Бога нашего милости нам грешным, поющим:
Аллилуия.

Икос 10

Стена еси похваляющим чудеса Твоя,
Богородице Дево, и всем с верою притекающим и
поклоняющимся Тебе и иконе Твоей
Спорительница хлебов именуемой, и глаголющим:

Радуйся, неистощимый источнике милостей и
щедрот; радуйся, любви Божественная
проявление. Радуйся, чудес преславных
совершение; радуйся, труждающихся и
обремененных сладкий покою. Радуйся,
терпеливых страдальцев дары благодатными
ущедряющая; радуйся, о храмах Божиих
попечение имущих духовною радостью
утешающая. Радуйся, несумненная наша надежда;
радуйся, тихое и доброе пристанище.

Радуйся, Благодатная, Господь с Тобою, подаждь
и нам, недостойным, росу благодати Твоея и яви
милосердие Твое.

Кондак 11

Пение наше не презри, Пресвятая Дево, и
сокровище любви Твоея не затвори от нас; щедрую
же руку Твоея помощи простри нам, да
прославляюще милости и чудеса Твоя, поем
Триединому Богу: Аллилуия.

Икос 11

Светлыми лучами чудес Твоих просвещаеши весь
мир христианский и заступаеши люди
православные, искупленные кровию Сына Твоего,
темже, припадающе ко святому образу Твоему, на

немже зрим Тя, Богомати, на воздухе над полями и нивами нашими, благословляющую собранная снопы хлеба, молим Тя, всемилостивая Владычице, род человеческий, осужденный в поте лица своего снести хлеб, в болезнях родити и в печалех питати чада своя, милостивно пощади и заступи. Даруй нам здравие и благомощие, да питаемии Тобою от силы в силу возрастати будем и вси исполнимся радости и утешения от щедродательных десниц любви Твоея, зовущи Тебе:

Радуйся, младенцев млекопитательнице; радуйся, устнами детей хвалу Богу совершающая. Радуйся, роса неботочная в знои трудов сущим; радуйся, подавающая требующим благоустроение. Радуйся, уготовляющая просящим изобилие; радуйся, многожды прошения предваряющая. Радуйся, печальных утешение; радуйся, скорбящих веселие.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 12

Благодатную помощь низпосли нам, Мати Божия, и егда изыдет сеяй сеяти, да не падут семена при пути или посреде терния, или на камени, но на земли добрей. Сотвори восход их, да произрастит земля плод сторицею, и мы вси в радости сердца благодарными усты вопием Богу: Аллилуия.

Икос 12

Поюще чудеса Твоя и милости, Владычице Богородице, хвалим Тя вси, яко воистину еси наша помощница, заступница, питательница и домостроительница, житие наше ко спасению устрояющая. Темже вопием Ти:

Радуйся, богатство нетленное нам подавающая; радуйся, брашно негиблющее алчущим правды. Радуйся, питье неисчерпаемое жаждущим жизни; радуйся, яко рай пищный процветаеши. Радуйся, верных спасительное прибежище; радуйся, покрове миру, ширший облака. Радуйся, ненадежных надеяние; радуйся, отчаянных спасение.

Радуйся, Благодатная, Господь с Тобою, подаждь и нам, недостойным, росу благодати Твоея и яви милосердие Твое.

Кондак 13

О Всепетая Мати, рождшая всех святых святейшее Слово! Нынешнее наше приемши приношение, избави люди к Тебе прибегающия от всякия нужды, глада душевнаго и телеснаго, смертоносных болезней и всякаго зла и вечныя изми муки, да с лики ангельскими непрестанно поем Богу: Аллилуия.

Этот кондак читается трижды, затем 1-й икос и 1-й кондак

Икос 1

Ангелов Творец избра Тя, Владычице, к благодатному человеков спасению, и дарова Тя, помощницу людем, избавляющую нас от глада и всяких напастей, житие наше добре устрояющую

во всяком мире и довольстве, темже со умилением
взываем Ти:

Радуйся, благодатное человеков избавление от
всякия нужды; радуйся, достоянию Твоему
помощь и заступление. Радуйся, христоролюбивыя
люди от бед спасающая; радуйся, алчущих
питательнице. Радуйся, сирых заступнице;
радуйся, нагих одеяние. Радуйся, израстившая
нам Плод Живота; радуйся, Спаса рождшая душ
наших.

Радуйся, Благодатная, Господь с Тобою, подаждь
и нам, недостойным, росу благодати Твоея и яви
милосердие Твое.

Кондак 1

Избранней от всех родов Божией Матери и
Владычице Небесе и земли, избавляющей нас от
всякия нужды, благодарственное приносим пение.
Ты же, всемилостивая Госпоже Богородице,
приими наше усердное моление, сохрани нас от
глада и пагубы, даруй земли нашей плодоносие,
Питательнице и Спорительнице нив и хлебов
наших, да радуящиеся всегда зовем Ти:

Радуйся, Благодатная, Господь с Тобою, подаждь
и нам, недостойным, росу благодати Твоея и яви
милосердие Твое.

Молитва

О, Пресвятая Дево Богородице, премилостивая
Владычице, Царице небесе и земли, всякаго дома
и семейства христианскаго благоустроительнице,
труждающихся благословение, нуждающихся
неистошное богатство, сирых и вдовиц и всех

людей кормительнице! Питательнице наша, рождающая Питателя вселенных и спорительнице хлебов наших, Ты, Владычице, ниспосылаеши Твое Матернее благословение градом нашим, селам и нивам и коемуждо дому, на Тя упование имущему. Темже с благоговейным трепетом и сокрушенным сердцем смиренно молим Тя: буди и нам, грешным и недостойным рабом Твоим, мудрая домостроительнице, житие наше добре устрояющая. Всякое же сообщество, всякий дом и семейство во благочестии и православии, единомыслии, послушании и довольстве соблюди. Нищия и неимущия пропитай, старость поддержи, младенцы воспитай, всех вразуми взывать ко Господу: «Хлеб наш насущный даждь нам днесь». Сохрани, Пречистая Мати, люди Твоя от всякия нужды, болезни, глада, губительства, града, огня, от всякаго злаго обстояния и всякаго нестроения. Обители нашей (или: веси), домом и семейством и всякой души христианстей и всей стране нашей исходатайствуй мир и велию милость, да славим Тя, премилостивую питательницу и кормительницу нашу, ныне и присно, и во веки веков. Аминь.